

Fundacion "Drecha Cas"

Un Organizacion Constructivo Den Tur Sentido



Un organisacion cu a merece tur apoyo pa su existencia tabata e Fundacion "Drecha Cas". Un organisacion cu a lanta door di algun persona cu mente positivo den nos comunidad, cu a dicidi di forma un grupo, cana rond pa wak unda nan por haci trabounan boluntario. Mas cu claro yuda esnan den mas necesidad prome. Den nan investigacion nan a bin ripara cu tin hopi cas di nos grandinan den necesidad di un reparacion.

Asina un grupo a lanta cu e meta cu tur hende tin e derecho di biba den un cas cu ta proteha pa biento, solo, awacero y insecto. E derecho humano basico

aki sinembargo, no tabata posibel pa tur hende pa falta di recursonan. Por ehempel, esnan cu ta depende di onderstand, pension, esnan cu edad avansa, esnan fisicamente of mentalmente incapacita, of hendenan muhe cu ta biba nan so riba un entrada chikito, tabatin tur e speransa di por a haya yudansa cu nan problema, danki na e fundacion "Drecha Cas". E condicionnan pa haya yudansa tabata: (1) e doño di cas mester ta biba den e cas. (2) miembronan den cas mester coopera den e trabou.

E fundacion aki cu ta traha sin ganashi, kende su presidente ta Ingeniero di Lago, Sr. Reimundo Barros di Process - Fuels Division, a ser funda na año 1974 door di clero catolico. E idea a surgi for di experiencianan haya for di Belgica y otro paisnan cu ta yuda esnan menos afortuna biba den mihor condicionnan.

Bou di e lema "Yuda Nos Yuda Otro", un campaña pa recauda fondo a cuminsa cu colectnan na misa durante Cuaresma 1974 y di esey Fls.4,400.00 a bay pa e fundacion nobo. Industria y comercio y tambe boluntarionan a contribui cu donacionnan via banconan y tambe cu material.

Despues un accion di "sticker" a yuda nan cu e gastonan creciente segun peticion pa yudansa tabata aumenta. Un contribucion significante tabata e ganashi di e benta di e buki "Savaneta Antes y Awor" di Pastoor G. van Veen, e tempo ey, Pastoor na Savaneta.

Pa dia cu e fundacion a keda estableci oficialmente pa un acta notarial na Februari 1975, e fundacion ya a caba di yuda den tres caso.



Ademas di Rei Barros como presidente, "Drecha Cas" ta conta cu e valioso cooperacion di e siguiente miembronan: Lorenzo Ruiz (Tesorero) Pastoor Gerard van Veen, Michael Wouters (empleado di Lago), Rudolf Bernabella, Eli Thijsen, maestro na Tarabana Technische School, Roland Lough, un pensionado Mericano cu ta biba mita aña na Aruba, y un grupo di boluntario hoben. Un di e pioneronan tabata Floriano Geerman, anteriormente Supervisor na e departamento di Mechanical na Lago, cu a fayece un aña anterior, cu e sosega na Paz.

E grupo activo aki, cu studiantenan di scolnan John F. Kennedy, Martin Luther King y Tarabana Technische, tabata traha bou direccion di lidernan experto. Nan ta dedica casi tur Diasabra na drechamento di casnan cu mester di reparacion. Loke por ser drecha ta ser drecha y loke ta den mal estado ta ser reemplasa cu nobo of poco usa. Ta pesey e fundacion constantemente mester cumpra material manera planchi di zim, clabo, verf, etc. "Drecha Cas" ta haci tur reparacion cu ta necesario, y contrario na loke tin hende ta kere, nan no ta instala azuleho of otro cosnan di luho cu e cas no tabatin anteriormente.



Tabatin un cas unda cu "Drecha Cas" a haya necesario pa forma un campamento den un barak durante ocho dia pa casi reconstrui un cas di tabla competamente na Santa Cruz. E cas, cual tabata un ruina completo, a haya tur loke tabata necesario pa su doño, un señora di edad, cu despues e por a biba trankilmente aden.

Miembronan di e fundacion, siendo boluntario, tabata traha sin recompensa. Cu e satisfaccion cu Dios mes lo recompensa nan debidamente. Ademas di yuda esnan cu no por a yuda nan mes, "Drecha Cas" tabata duna e hobennan aki e oportunidad pa envolve nan mes den problemanan social di comunidad, den un espiritu di cooperacion y consideracion pa nan prohimo. Nan satisfaccion di mas grandi tabata di ser util y yuda esnan den necesidad. Ta pesey "Drecha Cas" tabata haci apelacion na tur persona di bon boluntad pa yuda nan den e esfuerso valioso aki cual ta cubri un necesidad critico den nos comunidad. Fuera di e gruponan di hobennan, personanan cu pension y cu experiencia di trabou lo ta masha util pa supervisa e trabou y pesey semper nan tabata bonbini na e grupo di boluntarionan aki.

Yudansa por a bini tambe via un donacion na banco of un contribucion mensual riba cuenta di "Drecha Cas", na e banconan local of door di regala material usa.

Desde cu nan a establece, fundacion "Drecha Cas" a logra drecha diesun cas riba nos isla, seis di nan durante 1976. Tambe nan a inspira otronan den varios distrito, manera Savaneta, pa haci trabounan similar den nan mesun distrito. "Drecha Cas" lo duna tur ekipo y material necesario na e sub-divisionnan di distrito interesa pa haci e trabou aki nan mes, si nan traha segun e reglanan di e fundacion.

E directiva di “Drecha Cas” a haya un gran satisfaccion di por a ricibi un pickup Chevrolet den bon estado for di Lago. Tambe gobierno Hulandes a reconoce nan esfuersonan door di haci un donacion di Fls.37,500 pa yuda nan den nan plannan di reparacion. Cu e fondo aki a haci posibel pa drecha diescinco as, cual ta e casonan mas urgente, riba nan lista largo.

Fundacion “Drecha Cas” tabata afilia na organisacionnan similar na Europa, y despues hunto cu Corsou, Surinam y Venezuela, nan tabatin plan pa organisa den Caribe. Pero, lamentablemente, e fundacion a stop di existi mas or menos na aña 2009, pa varios motibo. Uno sigur tabata cu e miembronan tabata bira di edad y no kier a tuma e risico debi na loke e trabou aki tabata rekeri. Ami semper tabatin hopi elogio y admiracion pa e grupo aki di tur loke nan tabata haci pa comunidad, pero mas cu a impacta mi tabata e hobennan cu tabata usa nan tempo liber den fin di siman pa bin hunto cu e grupo aki pa haci cosnan positivo pa nan comunidad, algo cu ta carece hopi awendia. Pabien.

Dufi Kock

Escritor y Historiador

5 di september 2020